

本朝分省人物考

人物考卷之四十七目錄

浙江寧波府

程徐

錢塘

向朴附子道淳

桂彥良

鄭真

鍾鼎

俞士吉

樂枏

戴德彝

袁珙

梁田玉

附梁良玉何申梁中節  
梁良用宋和何洲郭良

陳敬宗

宋琰

張楷

金忠

蔡錫

陶厚仲

王來

陸瑜

陳濂

邵玉

應履平

楊守陳

周津

楊茂元

屠瀟

楊守隨

朱瑄

楊守趾

李堂

楊子器

袁爍

張昂

王渙

王應鵬

陸珂

柴經

周相

劉安

王杏

本朝分省人物考卷之四十七

浙江寧波府一

程徐

程徐字仲能浙江寧波府鄞縣人徐邃於春秋得父編修公家學由翰林院從事發身太史院校書郎遷奉禮郎爲中書曹掾從太史丞相軍擢禮部主事改刑部復改戶部歷任至兵部尚書致仕入國朝太祖高皇帝以才名召見命爲吏部侍郎洪武二年上以孔子釋奠止令行於曲阜孔廟天下不必通祀徐上疏極諫累數百言大要謂孔子儀範百王師表

萬世天下一日不可無教則其祀不可一日廢禮宜  
行於春秋仲月上丁遣使致祭於曲阜孔林廟仲丁  
致祭於京師廟學令天下府州縣於季丁通祀焉  
上允其奏改刑部侍郎三年陞本部尚書本年以壽  
終爲人精勤通敏剴繁治劇事無留滯能文尤工於  
詩歌有遺集傳後

錢塘

錢塘字惟明象山縣人博學敦古行洪武元年舉明  
經陳王道數千言雅稱太祖意特授刑部尚書二  
年詔孔子春秋釋奠遣使降香曲阜改廟於仲月上

丁致祭京師天下不必通祀塘上言孔子百王宗師  
先儒謂仲尼以萬世爲主天下祀孔子天下祝聖  
壽報本之禮不可廢也時修孟子節文并議其配饗  
塘論之尤力太祖皆從其議一日召講虞書陞坐  
而講或糾塘草野不知君臣禮塘正色曰以古聖王  
之道陳於陛下不跪不爲踞又嘗諫宮中不宜揭  
武后圖忤旨待罪於午門外終日上悟賜飯卽  
命撤圖本年致仕

向朴

附子道淳

向朴字遵博浙江慈谿人宋丞相文簡公敏中之十

四世孫父壽宗慈湖之學學者稱爲樂齋先生朴得其傳行務實踐力學養親洪武二十五年命督府都事張允直訪求人才以朴應詔陛見 高皇問居家何爲對曰種田其容秀而文 上心知其非耒耜中人也因詢大麥何以四節對曰以其占四時耳卽日授獻縣令單車就道妻子不入官舍時兵燹之餘爲之闢荆榛畚瓦礫教百姓農桑與同甘苦流移復業靖難師起獻當兵衝無城廓朴集民兵激以義勇與北將談淵迎戰衆寡不敵被擒不屈懷印受刑獻民哀之相與拾遺骸瘞道左副都御史陳瑛請究治死

事諸臣有楊姓者父子三人懼發掘夜負骨潛葬邑北十里永樂初中書舍人王尹實北上詢得葬所宿郵舍夢朴服血污葛衣譚其往事卽秉燭爲文乘星月往哭之涓川令韓彥起復匿其二子於任顧道輯其遺事書于寶峯庵佛座後三人者皆義士也二子道淳道徵道淳被徵竟稱痼疾不起有攀栢悲號之風嘉靖間祀鄉賢祠隆慶五年祀獻縣名宦祠萬曆初年奉 恩詔撫按建表忠祠於本縣北城門外

桂彥良

桂彥良慈谿人洪武初應薦召見特授太子正字錫

資有加召問治道彥良對以正心爲本而正心之要  
又在懲忿窒慾 上善之擢晉王府右傳一以正大  
之學輔導旣致仕條陳十二事名曰萬世太平要策  
以進所著有和陶詩清節等集

鄭 眞

鄭眞慈谿人博極群書在鄉里恂恂然不以才藝矜  
人嘗取諸家格言著爲集傳集說集論洪武初試浙  
闕居首選授廣信府教授號榮陽外史

鍾 勗

鍾勗慈谿人幼孤力學洪武初教授郡庠舉任廣東

番禺知縣有惠政官至兵部侍郎子永亦以明經舉  
官至戶部侍郎

### 俞士吉

俞士吉字用貞象山縣人父仲殷嘗夜夢得老桂古  
香分月窟移將天下厭羣芳之句覺而士吉生自幼  
岐嶷異常既長有司歷舉賢良弗就洪武丙子鄉薦  
明年會試中乙榜授兗州府訓導革除中上疏論時  
政得失十餘事徵拜南院監察御史出巡鳳陽徽州  
辯釋疑獄風聲肅然 文廟御極改廣西道尋擢右  
僉都御史奉使朝鮮已復使日本返報皆稱旨 上

褒賜有加永樂三年浙西大水士吉與戶部尚書夏  
原吉通政趙居任大理少卿袁復奏勅往治兼督  
農務時湖州被災虧糧五六十萬同事者以所虧之  
數反十倍於所輸欲損其數以上士吉力爭曰欺君  
病民吾不忍爲也雖重得罪吾自任之竟以實聞  
上允納悉蠲其輸仍勅發廩賑之民賴以蘇四年  
坐事謫爲辦事官尋復原職命賑恤兩浙饑荒六  
年出守襄陽政清訟簡郡以大治十六年秋滿最績  
陞山東左叅政未幾唐妖婦惑衆謀叛藩臬諸臣悉  
置於法士吉督濬後至衆謂可自爲計應目背死逆

命非臣節也遂就獄 上念舊臣釋之洪熙改元入  
覲欲授清要之職天官卿擬以太僕寺卿 上默然  
良久改刑部侍郎尋命清理直隸郡縣軍伍再蒞郡  
事功績尤著士吉儀觀修潔舉止清雅論議切直文  
采蔚然每視政他人不足已獨有餘且諛不喜犯不  
怒偉度洪量汪如也所著有櫟庵自貽藁

### 樂 枏

樂枏定海人也性孝友家以亭戶籍官枏承其役弗  
替洪武十二年春曾稽錢清高氏許從兄弟歲輸鹽  
痛自縮迫小民倍其輸以掩已之數事上聞 上以

浙河以東亭戶大家皆罔上賊下如一律卽遣使編  
各倉覆鹽有損常數者悉起赴京鞠訊咸承罪坐輸  
作而枌亦在逮中方治行其仲氏稅願代往枌曰吾  
之往也生死未可知設死焉吾有三子爾尚無後其  
可哉稅又詣縣庭請代枌枌白於官曰枌之名固不  
可易服力鹽事皆枌也稅罔知使往而被鞠必失對  
縣因不敢遣及枌行可一舍許稅又追及之枌叱之  
去不聽卽乘坭垣以塊提稅垣之塊去者半稅度伯  
氏心不可回慟哭而返十三年夏枌果死京役中年  
三十有六枌讀書窮理凡醫卜地理書無不習里之

人聞其死莫不泣下其父仲本爲鄉之碩儒當被貢天官方以老丐歸而旣歿亦痛惜而歿

### 戴德彝

戴德彝奉化人洪武二十七年進士第三人初爲翰林編修三十年與張信並陞侍讀上諭曰汝爲侍臣凡國家政治得失生民利病當知無不言昔唐陸贄崔羣李絳在翰林皆能正言讜論補益當時建文中改左拾遺靖難兵起與方黃畫兵事靖難後不屈死

### 袁珙

袁珙字廷玉鄞人少遊海上遇異人授相術論人吉凶輒驗 成祖聞廷玉名洪武二十三年九月密召至北平一見伏地叩頭仰對曰殿下龍質鳳姿天高地厚大明麗中神略內蘊真太平天子 成祖問度在幾何時對曰年踰四十紫髯過臍當是時撥亂反正萬邦一統 成祖喜留府中久之已而乞歸靖難以召爲太常寺丞子忠徹序班出金錢幣厚賞珙巡行北京召珙父子至行在出人禁廷未幾珙請老歸 半贈太常少卿忠徹能傳父術建文初 文皇召問忠徹對曰天命有之無憂也獻人象大成書靖難後

除忠徹戎籍會有言楚王子重瞳者遣往視還奏無  
他異宣德中嘗侍上言天顏慘肅恐宗人有急變  
謀上者未七日樂安反書至官尚寶少卿致仕卒年  
八十三

梁田玉

附梁良玉 何申 梁中節 梁良用  
宋和 何洲 郭良

梁田玉定海人歷官郎中靖難兵入金陵田玉與葉  
御史俱髡髮爲僧久之松陽人王詔遊治平寺觀轉  
輪藏聞藏上嘍嘍有聲異之令人緣藏登其頂無所  
見見書一卷載建文時出亡臣僚二十餘人事紙毀  
泐字多斷爛不可讀讀數日稍銓錄其可識者凡九

人人僅數言而定海居其六詔憐其忠又得之異各  
贊數語題曰忠賢奇秘錄贊田玉曰行儒名釋知我  
者誰至寶淪沒久而愈輝中書舍人梁良玉卽田玉  
族也靖難後訣妻子易姓名挾微貲走出金陵城踰  
嶺至海南寓市肆粥書以死贊曰忠臣蹇蹇遵彼海  
濤耽書玩市資以盍簪屯如遭如哀此陸沉何申爲  
中書舍人建文時奉使四川至峽口聞金川門不守  
慟哭吐血不數日直發於背死贊曰兩涯洶洶中作  
霹靂義氣馮殷與之俱激奸諛過此寧不惕息梁良  
用梁中節皆定海人父子兄弟八人同仕于朝靖難

後相率變姓名避去良用爲舟師已而投水以死贊  
曰泛泛栢舟載浮載沉中流誓楫懷我好音肯欠一  
死匪名是尋以完我族庶明我心何洲靖難後與中  
書舍人宋和同棄官去洲爲筮人和賣卜同客死贊  
曰箕子陳範嚴氏隱卜義有從否道有宜告烈烈英  
賢寥寥冥鵠郭良亦定海人良與梁中節同棄官爲  
道士贊曰駕言導引嘯傲林臯頽波莫挽使我心勞  
復合而銘之曰今吾故吾知我者誰瘖若漆身希蹤  
采薇戢戢潛龍寥寥冥鵠豈吝姬疇而甘漢卜山椒  
水滢天涯海濤會其可逢鼓以南音肯欠一死以明

我心白蜺晝見虞淵沉沉孰呵護此悠悠古今

### 陳敬宗

陳敬宗字光世浙江寧波府慈谿縣人少勵志問學登永樂甲申進士選入翰林爲庶吉士時與選者七十餘人再加精選得狀元曾棨等二十八人以應列宿之數讀中秘書文淵閣中敬宗與焉 文皇帝自教之益得以沉潛經史百氏之言 上時至閣勗其文行期與韓歐並驅先後敬宗愈磨礪奮發會大召名儒纂修永樂大典 命敬宗等考正訛謬書成授刑部主事明習法律練達時政甲午召入修五經四

書大全繼入史閣預修 太祖高皇帝實錄旣呈遂  
改翰林院侍講嘗獻北京賦平胡頌及爲善陰隲頌  
每元夕觀燈 賜讌皆儒臣應制賦詩 上獨稱善  
後丁母憂宣德改元起復修 兩朝實錄未及成轉  
南京國子監司業精察積弊首疏三事上之九年秩  
滿陞祭酒爲人美鬚髯容儀端整步履有則望之者  
起敬當會食諸生稍有失儀卽令待罪不輕容也或  
有所稟嚴於對君之禮居常持敬以身表率之每遇  
丁祭豫齋十日於廂房宿焉久居大學力以師道自  
任不少厭倦嚴立教條痛革舊習日勵諸生進于成

德有違犯者扣除坐堂月日悉爲虛曠豫示而堅守之以是畏憚不敢恣肆成均肅若朝廷焉戶部尚書關中楊鼎初發解於鄉試赴春官不利自北京求入南監從敬宗卒業其爲士大夫所重如此敬宗每對客善飲至酩酊尤自儼若未嘗飲者人皆服其量平生剛正介潔勢利紛如一無所累評者謂其撓之亂澄之愈清官太學二十餘年諸生位有至卿貳者而敬宗獨久不調意豁如也時北監祭酒李時勉約束諸生身教亦嚴世稱南陳北李景泰元年引年致仕德望文章名開天下退而家居不輕出入有被接

兄者雍容談論莫不感發興起別號澹然居士至是又號休樂老人云有詩文十八卷行於世曰澹然居士集天順三年卒壽年八十有三

宋 琰

宋琰字廷珪浙江寧波府奉化縣人永樂乙未進士改庶吉士預修性理大全書尋侍 皇太子監國南京永樂十九年召至北京預修永樂大典書成賜白金文綺授中書舍人宣德元年遷禮部儀制司主事蒞事翰林五年給假歸未踰月驛 召還京正統改元纂修 宣宗實錄是年丁父憂去服闋赴京轉吏

部考功主事俾直 內殿益慎乃職深見獎重九年  
遷河南布政司右叅政時汝陽歲旱苗將稿而蝗且  
盛郡縣官率以捕蝗出不少寧琰親往按視爲之惻  
然仰天歎曰方今 聖明在上仁浹海內而此土獨  
罹旱蝗之災豈非旬宣者政有乖繆而致然也凡有  
殃咎宜集我躬毋苦斯民爲也言未既有驚數十羣  
蔽空而下食蝗殆盡乃去大雨如注凡三日歲更稔  
吏民仰德歌頌之景泰四年轉太僕寺卿未幾遷兵  
部右侍郎兵機重務贊畫居多天順元年調南京兵  
部越三月以疾終於官性溫雅坦亮篤於行義居家

以孝友聞其學博究經史旁通陰陽歷數卜筮相法  
雖專業者不如及居官四十餘年所至輒著賢名處  
寮屬始終有禮性惡煩囂扁靜齋以爲退公之所恒  
以文自娛應人之求不少各有拙庵集藏於家年六  
十六

張楷

張楷字式之慈谿人登永樂甲辰進士授戶部主事  
時方北征輿馬之需甚急往督關中先期而集大司  
馬甚器重之拜監察御史初有巨盜繫刑部獄中吏  
受賂脫之乃劾尚書以下十數人皆罷黜名聲赫然

有兄毆人死誣與弟同毆歷臺審無能辨之者楷察其枉謂毆時爾安在曰在鄉學乃拘其師友驗之果然遂釋之庚申陞陝西僉事理屯田督租賦治水利俱有成績尋遷副使上安邊十二策多見采行丁卯陞右僉都御史閩賊鄧茂七作亂 朝廷遣將率兵徃平之以楷爲監軍兵至廣信賊圍延平甚急楷謂都督劉聚曰賊聞大軍至寧無懼心卽具榜遣人諭以威信賊果解去兵至鉛山賊圍將樂調都督劉得新乘夜襲之賊皆潰散茂七僅以身免退保陳山楷駐兵建寧四招其黨賊復攻延平乃以浙江軍伏後

平南京軍伏後洋江西軍伏沙溪之南而以福建軍  
諜爲賊所易者出城挑之已而礮作伏起合擊大破  
之遂斬茂七俘其衆餘賊有據九龍山者乃選精兵  
二千撤其筏誠曰明日賊必空寨來攻若疾入其寨  
而反攻之比旦賊視我營兵少果至溪上無筏而還  
二千兵已據其寨用滾木擗石下殪之賊衆遂降凡  
定三郡七縣破三十六寨擒僞總兵學士等官三百  
二十四人招掠其民八十餘萬處州賊葉宗留亦起  
復勅楷旋師與都督徐恭互相犄角至卽伏兵鴨兒  
芭爲壘賊至麾兵擊之少頃佯走賊追逼壘伏兵四

起一鼓殲之景泰改元班師至京有妬其功者劾以  
初至耽詩玩寇罷歸英宗初位念其舊勞詔以原  
官致仕明年陝西興師禦虜督軍者難其人適楷至  
京入謝上曰朕得其人矣遂以楷往還京上嘉  
勞之轉南京都察院方專委託而竟以疾卒年六十  
有三計聞遣官諭祭令有司營葬事

### 金忠

金忠鄞人少慷慨負義兄戍通州省兄會靖難兵起  
布衣田冠上謁典儀云浙東奇士金忠願見殿下說  
兵事及中朝動靜得召見忠言殿下太平皇帝小人

耕江海間及來往齊魯道上聞殿下賢譽服人心久  
矣茲舉大事人材爲急 成祖悅立授署紀善日侍  
帷幄贊理戎務尋陞署長史已爲真靖難後陞工部  
右侍郎治事北京永樂二年召入兵部爲尚書忠博  
覽史籍議論河懸諸位未定 上密問忠歷數古昔  
嫡孽故事以對 上喜賜以大鎚又曰詹事宮端汝  
以尚書兼詹事幸善調護佐太子忠侍監國時勸起  
孝敬篤友愛小心敬慎無失禮毀譽禍福聽諸天日  
而已或譖謗廷臣及宮寮過者 上密令察審忠退  
數日頓首再三爲白無此事願陛下寬霽 上或不

喜卽又頓首言臣敢保其無他他日有踪跡卽如人言臣甘連坐以故諸所全護者多謹厚不洩人亦不知也忠每導人寬愛無爲苛刻公事輒推同官使展其才能有闕悞引爲已過不遺片善不念舊惡俸賜有餘周賑鄉族太子卽位念忠贈少師謚忠襄以其子達爲翰林檢討達幼遣歸寧波學支俸讀書比長景陵召達還翰林正統十二年改禮科給事中陞都給事中景泰二年出爲長蘆運使

蔡錫

蔡錫字廷予鄞縣人永樂癸卯舉人入國子監仁

宋朝詔擇國子生有學行者吳信等六十人命翰林院嚴試之拔其尤者二十人充近侍官錫與焉選授兵科給事中彈劾不避權貴陞知泉州府廉慎勤敏孜孜爲民樹長畫剷剔宿弊興學校均徭役奏除洛陽東山大橋三鎮戍兵公私便之尤善摘伏境無盜竊時洛陽橋圯發故石有刻文云石頭腐爛蔡公再來橋故宋太守蔡襄所建而錫適以守至遂捐俸重修民德之立祠其旁配享端明陞山東副使奉勅叅贊宣府軍務以功陞順天府府丞正統九年服闋改應天府十四年秩滿陞大理寺卿皆有異政奉

勅巡撫湖廣大饑設法賑濟賴全活者數萬家肖像尸祝之尋乞骸骨歸蕭然圖書不持一物囊無買山之貲至餽粥不具逍遙吟諷晏如也有賀山稿傳於世

陶垕仲

陶垕仲鄞縣人初以國子生擢御史彈擊不避權勢上雅愛重之陞爲福建按察使時福建多滯獄吏貪緣爲奸垕仲至治賊吏數十人盡革其宿弊又興學勸士撫卹軍民自奉儉薄有餘悉以施貧者其清介類如此是時布政使薛大方貪暴自肆垕仲劾奏之

大方有詞逮屋仲至京事旣白大方得罪詔屋仲還  
官閩人迎拜爲之語曰陶使再來天有眼薛公不去  
地無皮後卒於官

王來

王來字原之其先河南陳留人因始祖慶元通葬浙  
江慈溪遂家焉 洪武初祖以桓明經學古起爲國  
子監學正召對皆稱旨來天資豪邁聰明絕人金溪  
邑有五聖祠善爲禍福來自負宏達不信邪妄一日  
持斧往碎像而燬之撤其神祠不能爲殃衆驚異因  
父在金溪日爲武弁所誣奏 上遣法司訊之當理

而遭疾時年幾弱冠辯甚悉事遂白法司奇之命賦  
衡鑑堂詩立就厚致贈焉宣德改元以禮記中浙江  
鄉試第三仲弟以詩經同領鄉薦明年會試中乙榜  
弟登進士來授新建學教諭既至作新士氣啟諸生  
義理之學多所造就其條教至今傳以爲式先是諸  
土府時祭以郡學生員充樂舞生來以爲妨學業亟  
奏罷之以道士充焉遂班著爲法宣德四年大比山  
東聘爲考試官六年朝臣交章舉薦拜江西道監察  
御史七年巡按姑蘇諸郡首除橫歛豪猾屏跡小民  
安堵民間有喪多惑於陰陽利害或以喪地未擇喪

儀未備至數年不舉嫁娶亦以財禮相較致男女婚  
剋失時者於是嚴爲禁約婚喪畢舉咸無愆期尋奉  
命同侍郎周忱考察官吏制詞有請自  上裁之語  
來曰此  勅宜復奏請而貪官污吏當去宜卽去之  
若稍遲留民益受弊矣時三楊柄國因覽奏曰雄偉  
之才明達治體如此遂易之由是貪暴望風引去當  
時考課之公推爲首時有巨璫陳武以  太皇太后  
懿旨散經江南於蘇常要素百端勢張甚自巡撫以  
下皆畏之獨爲所抑收其榜與  詔書不合擬劾其  
矯制之罪中使哀祈得免及還愬於  朝翊日朝罷

上問都御史顧佐曰蘇州巡按爲誰佐曰王來上  
日記之及代還佐引以奏上加獎諭賜食光祿  
內臺之名益重宣宗駕出居齋闕來在扈從因以  
守邊策進上嘉納焉十年監京鄉試十月詔在  
廷舉方面少師楊士奇首薦之拜山西左叅政抵任  
卽禁橫歛寬逋負革濫役戢奸頑清刑獄寃民隱居  
數月宿弊盡去郡邑肅然正統元年丙辰勅兼總  
督大同宣府邊儲革舊營充運等奸弊每歲起徵預  
置稽考循環文簿發府州縣凡錢糧解收貯纖悉精  
明官民便之其年通計得餘剩金錢布帛七萬有奇

而邊儲自此無愆期之患時山西邊儲浩大民力疲困巡按御史孫膺奏必得藩臣之廉明有爲者臨之則郡邑有所畏憚庶幾事集而民安因以名聞上特勅管理司事兼理邊儲軍政稱職及審重囚遠年滯獄寃情多所平反六年又以國初創立預備四鄉倉移入城郭以庫藏贓罰平糴每歲所積糧有二千四百餘萬山西之民雖遇荒歉皆獲利焉七年巡撫侍郎于謙奏舉自代命未下權貴中擠調廣東左叅政抵政卽禁師巫邪術務崇教化厚彝倫皆約於禮法之中嶺南之地翕然更化按所屬卽將山西

轉運邊糧抵數於小戶內減免庶東南無賠償陳腐之患九年爲提調官釐革舊弊得人爲盛如大學士丘文莊其所首拔也十四年流民屯聚陳許等州無慮數十萬操戈相殺累歲不息特陞河南左布政使招降之勘其人戶悉令附籍與土著之民參錯編爲里甲處於空曠之地任其耕作免其調發時周王以不軌聞朝廷議討之力言其不可請自往宣諭因馳入王宮指陳順逆禍福王乃闔宮痛哭隨教以上書陳請解護衛卒彌其變又見四方多事卽繕器講武積粟以爲備時多賴之十四年黃河水泛濫衝激

田廬且逼近汴城乃乘農隙借倩人丁躬率築堤捍之栽柳以固汴民至今獲利名曰王公堤九月陞右副都御史巡撫湖廣河南提督有司賑恤流民凡軍民利病官吏否臧皆得便宜處治時河南軍伍空缺乃籍其丁多之家出丁有差號曰機兵精器械嚴武備以耀兵威及聞京師有警卽親率所統官軍馳赴策應欲斷胡人歸路自是胡亦不敢近上遣行人王鑑賫勅獎諭景泰改元陞右都御史兼大理寺卿奉勅諭以湖廣貴州等處苗賊作耗殺掠官吏命將征勦尚未殄絕特命卽自河南往彼總督叅

戎以下悉聽節制受命馳至湖廣沅州考圖定策運  
謀設法勉諸將以忠義以官軍九萬八千分爲五哨  
三令五申前進靖州等處分兵連戰大破之斬首三  
千餘級賊勢窮蹙遁遁相蹈藉溺死者甚衆乘勝長  
驅擣其巢穴酋首走香鑪寨其山壁立千仞根盤三  
十餘里乃審鄉道築排柵架飛樓以全鎗火箭晝夜  
攻擊又置襄陽砲六座四圍擊之裂其崖石絕其糧  
道賊衆大窘生擒王韋同烈并將官五十八人械送  
京師餘數萬并東西苗蠻悉撫定之號令嚴明所過  
秋毫無犯土官安龍富等爭田聚兵相殺乃因其曉

諭卽悔悟謝罪各以牛馬來獻更勞以羊酒衆請勒石爲碑自屬文立平蠻恩信碑於貴州清平之通衢捷音馳報上特遣禮部主事孫茂齋勅獎諭仍賜金帛以示旌賞班師回京上召見便殿慰諭再三勞以羊酒兼賜宴光祿次日謝恩陞南京工部尚書仍兼大理寺卿朝廷大事內外守備及九卿會議咸取決於來條陳時政十二事其目曰敦教化以厚民俗勸農桑以益本業汰冗官以省濫費罷造作以甦民力明賞罰以勸事功崇師道以育人才修武備以振兵威抑奔競以勵士行嚴選舉以進賢能

選將帥以寧邊鄙增屯田以紓民運救荒政以備旱  
澇先是部中修造等項多無統紀以出納經費侈奢  
無考而所屬緣以爲弊至是皆疏剔洗滌分目列件  
悉奏釐正之百役靡不就緒遂定爲成規凡南京五  
府六部及各衙門民情軍務必叅酌切當敷析詳明  
俾上不失體下適事宜民皆便之天順改元丁母憂  
終喪成化六年卒於家年七十六歲

陸瑜

陸瑜字廷玉浙江寧波府鄞縣人聰悟夙成弱冠登  
宣德癸丑進士奉使湖廣徵發海艘率禮愼法無毫

髮掛吏議丁繼母憂服闋除刑部山西司主事時郎  
中仲閔爲之長以瑜爲偉器每舉洪武永樂間法比  
沿革告之且曰子他日必大用不可不知 國朝舊  
典故瑜於律例條格多究心及大用每舉仲閔之言  
戒勵屬官及差盤 內帑貨幣勾較精密中官無敢  
欺隱者遷廣西司員外郎正統九年歲旱 英宗慮  
天下獄多寃 勅往淮揚蘇松等處十七郡審錄繫  
囚多所平反諸郡繫囚得釋者三百餘改從輕者又  
千餘人大司寇金公濂語寮屬曰陸員外克體 朝  
廷欽恤之意矣遷貴州司郎中丁父憂服闋改四川

司郎中景泰二年陞山東布政司右叅政使齊東薦  
饑貧民相率持杖發富室廩粟前使坐以強劫死者  
三十六人瑜曰民苦饑攘粟以延殘喘耳改坐白晝  
搶奪而三十六人皆不死河決張湫 朝命僉都御  
史徐有貞塞之徐委瑜督其役時工匠集者數萬乃  
爲設方畧編荆爲筐實以土石沉而築之水患遂息  
尋轉左布政使天順二年冬以李文達薦徵拜刑部  
尚書及 廷謝 英廟見瑜奏對洪暢進退雍容與  
左右曰刑部得人矣瑜久居法曹練達 國家典故  
凡有大獄屬官不能決者質於瑜則曰某時某所犯

類此退索故牘閱之年時無少差時錦衣衛指揮門  
達怙寵作威弘農衛卒誣指揮李斌與其弟健謀反  
事下 達鞠之達煅煉以爲反狀已具奏 請會三  
法司審問衆相顧莫敢異論瑜獨言其寃達怒侵瑜  
瑜曰法司所執者 祖宗之法耳吾何敢捨所執法  
在人滅族之罪邪達反譖之於上 上曰彼特欲重  
愼耳及奏上誅止斌兄弟而免其妻子曹欽反武夫  
希功者執其個人送官以爲逆黨凡數千人瑜語都  
憲李公曰欽之反起於倉卒個人相去或數百里安  
得與謀柰何使數千人無辜而死并籍其家耶李以

爲然於是個人皆不坐 上素重瑜或獵近郊或遊  
上苑輒召從行禮遇優渥 憲宗初開經筵瑜與羣  
卿侍有白金文綺之賜成化三年夏尚書九載滿上  
疏乞休不允復任五年忽感風疾甚劇 上遣中使  
臨問御醫療疾賜以酒米食物疾少間乞致仕復不  
允特免朝參仍理部事越兩月疾復作疏懇謝事  
上乃許之辭之日 賜寶鈔千貫抵家以泉石詩酒  
自娛劉純幾滿瑜端亮有容寬裕有制爲刑部尚書  
十五年明習法令而無與世浮沉之譏屬官賢者禮  
之如賓有險且暴者馭之甚嚴及其改過則坦懷待

之不追咎其既往人以是德之弘治二年卒壽八十一謚康僖

陳濂

陳濂字德清鄞縣人正統乙丑進士授南京刑部主事明習文法一如素官時有鎮海戍卒故亡賴誣衛指揮以下數十輩不法事同獄者又代爲僞帖以質其奸株連逮繫乃以屬濂遂得其情而釋其餘譽益用起已乃署員外郎事景泰三年陞廣東按察司僉事天順三年轉副使巡視海道海故盜藪而圍山又瀕海盜勢猖獗濂輒親冒矢石出奇應變日夜露禱

誓不與賊俱生忽雷電交作風雨晦冥盜迷瞶相擊  
殺俘馘無筭海南肅然成化元年陞廣東左布政使  
四年陞巡撫廣東右副都御史廣人頂盆欣戴頌聲  
大作連歲兵興供應師旅勞止日甚濂懇懇矜惻如  
或傷之五年奉命總督漕運勤疏濬嚴監督立程度  
輸運無後期兩淮故南北孔道諸豪家漁獵貨貨卒  
多橫暴凌啖庶姓悉裁以法善良咸獲其所七年丁  
內艱去八年適河南缺巡撫上謂非濂不可詔起  
復濂灑泣就道未幾又命巡撫北直隸兼巡紫荆諸  
要害九年上又以漕運事重還濂原任比至淮疾

作卒於蘇

邵玉

邵玉字德溫慈谿人舉宣德十年鄉薦正統元年登禮乙榜授汝州學正歷遷南寧河間二府學教授合九年考最吏部遷順天始以京秩入流品以薦超擢雲南僉事兼督貴州未幾墜馬傷足遽謝事以去居十有餘年乃卒學本諸經史爲文章典雅有法氣象嚴毅行甚謹飭不苟爲酬應爲教必先孝弟忠三者期以磨濯焉在雲南凡所按試冒險阻窮歲月未嘗色倦三應聘爲考試官山東西俱號得士而江西得

故侍讀彭公教爲解首若學士張公元禎禮侍郎傳  
公瀚董公越祭酒羅公璟皆時名士鄉榜之盛無與  
爲比德溫在汝設饘粥以救饑民在山東有士子囊  
金求舉斥弗納在山西作誓心詩以見志在雲南見  
道旁羣婦稱夫死戍携幼而啼饑者督有司查其籍  
廩於官此其懿行善政尤爲膾於人口云

### 應履平

應履平奉化縣人由進士歷任德化知縣稽勲郎中  
獻河清賦陞德安知府秩滿陞貴州按察使正統中  
奉勅同尚書王驥平麓川苗寇進雲南左布政使尋

乞致仕爲人剛直不阿所至祛除奸蠹民多便之且  
嘗論列時政多見采納

### 楊守陳

楊守陳字惟新浙江寧波府鄞縣人父自懲官止泉  
州倉副使其姪也母張宜人夢星落懷中及生天庭  
有黑子七如北斗見者竒之五歲卽端恪如成人而  
才識穎達受業於祖栖芸先生日記數百言稍長學  
舉業及爲古文辭屢出流輩四方多傳其文以爲式  
栖芸恒誨之曰聖賢之學以靜思力踐爲要博聞強  
記輔之而已遂大有所悟入作致知力行持敬三銘

以見志景泰庚午舉浙鄉試第一辛未舉進士選翰林庶吉士未幾丁父憂而祖父母相繼卒居喪七年學識益邃天順戊寅服闋授翰林編修預修大明一統志尋被旨授徒內監辭不許憲宗卽位選爲

經筵官修

英宗實錄成化丁亥以考績陞侍講踰

月實錄成陞司經局洗馬每進講必積誠納忠以感

悟

上心一日講武成篇曰魯論稱舜無爲而治周

書稱武王垂拱而天下治然後世人主有深居禁中

委政內侍者召望夷之禍有高居無爲惟寵嬖豔

啟祿山之變蓋舜武之所以無爲者由其舉相去凶

得信明義無一不盡其道皆常憂勞而有爲乃始佚  
樂而無爲也後世人主則孟子所謂安其危而利其  
菑樂其所以亾者耳此聖狂治亂所以異也聽者悚  
然至於應制詩文亦舉筆不忘勸戒壬辰遷侍講學  
士校刊通鑑綱目預修續通鑑綱目母喪去所教中  
官已多貴幸凡預教者率因之以進獨陳泊然無少  
藉有欲出力援之則謝曰我嫠婦也抱節三十年矣  
乃垂老而改志耶縉紳往往傳誦其言 孝宗出閣  
被選日侍講讀會文華太訓成陞詹事府少詹事兼  
翰林侍講學士大訓篇目多本大學衍義獨事涉中

人者悉不以書守陳曰是何以爲訓撮其賢否得失之故分註一條議者不能奪守陳雖晚始遇而名重一時吏部嘗擬國子祭酒在廷大臣合辭舉堪吏部侍郎宜入內閣皆不果用 孝宗登極加恩舊僚始擢吏部右侍郎初當道猶擬南京 上覽疏取筆塗南京二字其被眷知如此 詔集議祧廟禮部侍郎倪岳請祧 懿祖而以 德祖比宋僖祖百世不遷守陳抗言禮天子七廟祖有功宗有德乃孔子之言故凡號太祖卽始祖必事之以配天若商周之契稷皆以功而非論其本統也宋之僖祖及我 德祖可

比商祖乙周亞圉非桀稷比議者所議大宗徒有取  
於王安石之說而不從孔子遂使七廟之間既有始  
祖又有太祖太祖旣以配天而無南向之位名與實  
乖豈先王之禮哉若謂降而合食爲非禮則王者旣  
立始祖之廟又推始祖所自出之帝而祀之固無嫌  
也 憲宗升祔請并祧 德懿熙三祖自 仁宗以  
下爲七廟異時祧盡則以 太祖擬商周桀稷而祧  
主藏於後寢祫禮行於前廟時享則尊 太祖祫祭  
則尊 德祖各不失尊庶無悖禮議者竟不能從弘  
治戊申上疏論講學聽政累數百言大略謂 陛下

御極以來屏棄珍玩放遠奇藝登用正人聽納忠諫躬覽題奏日勤政務若此不懈可幾堯舜臣愚過慮革故正始猶易持久保終實難由得弗深外資弗博銳志少懈欲心漸滋豈能保終始如一乞開經筵御午朝聽講之際凡所未明輒賜清問必待聖心洞然明悟而後已一日之間居文華殿之時多處乾清宮之時少使欲寡而心清惑少而理明則得於內者深而出治之本立矣午朝有事者皆先用略節口奏而裁決之大政則召大臣面議未當則許諫官駁正而審行之俾賢才常集於目前視聽不偏於

左右則資於外者博而致治之綱舉矣若但如近日之聽日講御午朝以應故事凡百題奏皆付內監諸臣調旨批答臣恐積年之弊未革而將來之患難測不但如前所過慮而已 優詔嘉納諭禮部以三月

御 經筵禮部得請并午朝如楊某奏會修 憲宗

實錄 命兼副總裁守陳念更化初凡吏部有所陞

黜人必視其忠邪易險愿奸爲趨舍故侃侃持議雖取嫌忌於同列弗苟徇也已酉再請解部事專史職不許章三上乞致仕且曰吏部進退百官衆怨所集聞望如王恕尚招人言况臣迂踈豈勝此任 上不

許始命以本官兼詹事府丞供職史館如故管言古人謂國可滅史不可滅我太祖旣混一卽命儒官修元史太宗靖難後史官不紀建文君事遂使當時朝政與忠於所事者皆闕略無傳及今猶可補輯景皇帝已復位號而英宗實錄標目猶書郕戾王是宜改正章疏留中者雖有可傳例不得書乞宣付史館擇而書之奏未及上以十月十八日不起初太白星見占者以爲賢人厄蓋其應云方疾革語其弟守趾男茂仁曰吾仕登三品年邁六十斯何憾惟上恩厚不能報先棲芸先生未及封汝曹勉圖報稱

以繼吾志語訖不亂端坐而逝訃聞 上悼惜賜謚  
文懿命官諭祭給葬事後二年實錄成 詔贈禮部  
尚書又三年以 春宮舊恩許錄其孫美璜爲國子  
生所著述有三禮周易尚書詩孝經大學中庸論孟  
私抄凡數百卷皆正其錯簡更定其章句詮擇諸家  
之傳詮而傳以已見雖大儒之說不苟同蓋晚年屢  
加刪定未始輕也

周·津

周津字文濟號月航世爲慈谿人領成化庚子鄉薦  
登甲辰進士學士楊公守陳一見奇之謂濟時才也

丙午授行人時北虜臨邊假貢獻以覘我虛實廷議  
推津往諭之虜見津風神皎然詞義峻整齧指羅拜  
而去弘治庚戌轉南京監察御史會內察悉心咨訪  
不徇衆好惡以爲雷同督造四十八衛軍冊盡得奸  
弊而釐革之監龍江瓦屑二樵務中貴百計啗之不  
可得守備巨璫蔣琮欲求一見無由致之一日治具  
蕭寺托津同僚相邀及門始知卽策馬而返閣臣丘  
公濬與冢宰王公恕素不相能嗾人訐之飛章劾丘  
謂其以博物洽聞之儒臣處經綸密勿之重地乏休  
休有容之量爲妨賢病國之謀本之則無焉用彼相

時言路劾丘者衆而津所論辭若緩而義愈嚴疏入  
舉朝譴之甲寅奉勅清戎山東尺籍無隱漏建白利  
害凡十事無不切當復兼刷省卷磨勘有法方伯而  
下皆敬服之戊子丁外艱庚申服闋轉九江知府平  
易近民以通上下之情爲之寬徭薄賦洗冤澤物汲  
汲如不及郡當要衝使舟如織津以連歲兵荒一切  
館穀夫皂悉損其半王喪過郡舳艫數百艘蔽江  
而下州縣入夫遭舟人索錢之虐落水并饑餓死者  
無筭津編成甲令互相救援無一失所者在郡移守  
瑞州比行老稚攀送哭聲震野至瑞州卽疏蠲逋賦

與民更始先是上司凡盜起必責捕盜官緣此畏罪不以聞釀成大患上書巡視都御史林公俊謂寬巡捕之法重獲盜之賞盜乃可彌謂漢時郡國多盜聽其自相斬獲以除其罪吏逗遛回避者勿問惟以擒討爲效此策今宜用之後賊首王武果擒其黨劉洪等若干人林公深加賞歎久之訛傳賊將劫獄一日報三四至官吏士民奔竄一空獨與捕盜通判甘文紹堅守不去號召民兵以爲扞禦且遣卒入獄防變文紹家僮殺死囚四十七人時有銜津者遂加羅織文紹亦因以歸罪焉坐是繫獄兩期自以身爲正官

宜獨任之無一語以及文紹瑞民擊登聞鼓訟寃事  
下兵部劉公大夏覆奏得旨還其原職再至瑞地方  
無虞良善得所分守王叅政治獄深刻執不從曰先  
儒有云殺人以媚人吾不爲也王卒不得逞亡何逆  
瑾用事與正人爲讐二次罰米輸邊不下八百石計  
無所出瑞民爭先代輸後以積俸及鬻產償之已已  
轉江西左叅政分守湖西并嶺北二道嶺北以盜湖  
西以訟爲諸道最盡心竭力撲滅爬梳盜訟寢亦衰  
息庚午轉雲南按察使辯釋寃獄旌別屬吏振肅紀  
綱鎮守崔某軍牢毆人至死必置之法總兵沐公下

人有犯未嘗少貸沐公亦雅重之片紙追呼必令如期而至土官那代兇殘嗜殺白骨盈壑畫策擒縛竟亦服辜壬申轉雲南右布政使滇瀝爲患隨濬隨塞蓋源廣末狹理所必至乃鑿漢嚴諸墩復開子河以殺其勢永利至今甲戌轉貴州左布政使未及行改廣東丁內艱去病卒未卒前一日月有紅光空夜墜于庭

楊茂元

楊茂元字志仁浙之鄞人成化七年鄉試第五十一年會試第四 廷試第二甲第七是歲秋八月授刑

部陝西司主事練習法比大司寇林公聰大器之時  
有巨璫占民蘆塲若干頃盡以歸民同年楊仕偉者  
爲同部主事中貴汪直誣以受賄事結徵贓仕偉以  
乃祖太傅公 恩賜銀四十兩輸之不足又稱貸以  
益時忌直莫之敢與乃違衆假之隨署其封曰刑部  
主事楊某俸銀十兩直見之歎曰好膽氣仕偉之誣  
遂白十七年陞福建司員外郎十九年陞四川司郎  
中明愼益著二十二年奉 勅錄南直隸囚冊舟次  
邳州夢血面女子訴冤一夕三至且稱已訴成善矣  
黎明詢之成善乃衛巡捕官先有告者含糊不明但

尸屍所耳乃令覓其屍果得蓋此女餉夫之叔於田  
時苗甚茂求姦不從怒而鋤其鼻死遂瘞之拘審卽  
伏凡情可矜疑者多所平反二十三年陞湖廣按察  
司副使清理屯田屯田奉 勅自茂元始先是官廨  
多崇莫敢居者至卽居之從者夜聞戶外人言福星  
至矣竟寂無譁弘治二年冬聞文懿訃歸繼以母憂  
六年服闋授山東按察司副使適河決張秋 孝廟  
初命劉都憲大夏董其役繼太監李興平江伯陳銳  
共治之興銳事多不法乃抗疏首言治河之策次言  
水者陰象其應爲後宮爲夷狄請戒飭后戚防禦邊

寇取回輿銳專命大夏自治又請罷取天下畫工仍  
革臨清鎮守凡三事 上以太監總兵官不必取回  
但令裁省禁革而已由是輿銳憤恨圖以報復誣元  
妖言 詔差百戶胡節械繫至京山東民沿途遮胡  
泣訴稱冤胡亦與之泣擁莫可行行將濟河濱河民  
亦然乃慰諭以去及 陛見挺身跪不伏 上益怒  
繫錦衣獄南北言官交章論救 上察其忠謫長沙  
府同知後河治一如其策當時 廷議謂茂元前疏  
與父文懿講學聽政疏實相表裏而剴切過之所爲  
有是父必有是子也抵府卽署事民適阻饑緩之以

蘇民生嘗以寬一分則民受一分之賜在長沙革驛傳之包當禁屬邑之餽送却屋稅以支應量地方以供祀要以省民已耳醴陵淶江橋通七省自李唐來已有七墩立江中架木其上不久卽毀茂元知舟渡被溺者衆因爲文勸諭且先蠲俸以助民樂爲之越二載以疾篤歸里家居五年言官論薦者無慮數十疏十六年起陞安慶府知府義不獲已止攜二僕以行時府多火災軍民苦之乃爲之募城隍患卽彌息歲連旱必齋素徒步懇祈於紅塵烈日間雨大注其却鹽稅逐倡優奏減胡羊價銀及革天下稅課司

之在州縣者尤甚有碑於民十七年入 覲太宰馬  
公文升揚言於衆曰若楊某者天下第一知府也十  
八年陞廣西布政司右叅政風采益勵罔卹烟瘴徧  
所部而迓思恩田州二府土官岑峻猛相讐殺貽患  
地方正德元年 上命三府進兵乃率前哨擒岑峻  
并黨屬一千有奇 詔改二府爲流官降岑猛爲福  
建平海衛千戶猛遂擁兵據治勢甚猖獗乃臨其境  
諭以禍福猛言不便遠遷故耳茂元曰是不難卽今  
魚窩等寨苗賊背叛汝能備兵從討以功贖罪吾將  
奏請爲爾免遷猛卽叩頭願從魚窩等寨者柳慶猺

獐也其酋韋朝宣等亂先是三府具聞其年亦

勅令三府征勦乃協同將官勦破魚窩等寨擒斬甚

多事定奏免其遷又黃文昌元弟三人久爲思明

府患守巡官節討之輒敗績二年陳都憲乃委同總

兵官相機撫勦文昌聞之面縛乞降乃徙文昌而平

其黨三年請老不報時逆瑾差御史孫迪查盤廣西

布政司庫各道皆措銀千兩以餽瑾茂元若因聞同

鄉謝迪嘗諷言無千金難免桎梏之禍對曰千金之

餽非盜官帑則剥民脂以此自救是畏無妄之災而

犯有名之律譴將益深故誓死不爲迪語塞竟不能

害四年夏吏部擬陞江西右布政使瑾僞 旨令致仕千金之憾也卽買舟歸五年瑾誅起任江西右叅政尋陞雲南右布政未至轉左時征勦郡盜餽餉有方且查殺傷者給帑醫治士心感激司庫有贖銀幾百鎰曰無礙錢吏白惟所用乃叱之曰此正在法賊也烏得無礙藉以識之其大理奇石之類一切不取七年秋復疏謝事不允陞貴州巡撫僉都御史奉勅兼制四川酉陽湖廣湖北諸道以討五寨平頭烏雞等苗寇改南京都察院右副都御史旣得咨以爲兵糧已集事貴神速若需交承寇有備矣乃駐扎湖

貴界遣將募兵不一月寇悉奔潰是捷尤偉茂元疑  
平民必有橫罹鋒鏑者寢息爲之驚愕晝夜批答神  
傷邁疾其年秋陞南京兵部右侍郎久之始赴任九  
年改刑部右侍郎累辭不許十年兵部錄貴州功  
賜白金織文紵絲十一年以疾卒年六十有七茂元  
孝友天至目能視烈日久不眩生平倜儻有膽略見  
義當爲毅然爲之不自顧少登高第躋膺仕不見色  
喜中遭偃蹇屈下僚略無怨悔且問學宏博爲詩文  
飄逸俊麗有麟洲存稿若干卷尤工書法其在長沙  
於岳麓書院復構尊經閣極高明亭各一考文公年

譜凡遺事有繫長沙者分爲八題題以篆勒譜以楷  
錄親爲之贊贊以隸書皆手筆也張都諫弘謂其草  
書字畫遒勁匪特臨池之功抑亦正毅之氣隨寓而  
見也時以爲格論

屠 瀟

屠瀟字朝宗號丹山鄞縣人母徐夫人夢老人授一  
大珠吞之遂孕瀟生有異贊五歲能記小學孝經諸  
書七歲徐夫人得疾劇用藥罔效恒跪問疾夫人戲  
曰須汝肉愈爾瀟卽往割股肉破血流父見而驚抱  
諸夫人瀟泣不已夫人強止之領成化乙酉鄉薦明

年丙戌舉進士未幾以疾乞歸五年疾愈之京選試  
湖廣道監察御史公暇輒闔門習法律每至夜分時  
士襄敏越掌院事委掌章奏凡所論列叅駁多其手  
稿越不塗竄一字七年奉勅湖廣盤糧所在必躬  
詣考覈或有以耗糧坐重典者則曰非侵盜法不應  
重典悉減論岳州倉官高鑑爲軍士挾私憾受誣瀟  
廉知其姦親往閱實乃抵罪誣告者武岡大使恐缺  
兒糧潛落厥經一葉約沒糧二千石旣發其事且曰  
其必自盡陰使人伺守之其夜果就縊守者捕送瀟  
廳倉得實數杖釋之歷四十餘所去官吏過半無冤

稱者十年巡按四川四月歷覽殆徧乃摘其尤弊者  
十事約禁之民吏歛飭姦宄銷沮後人有刊其榜文  
爲典刑者十五年用王越薦特陞本院右僉都御史  
十七年陞左又二年陞右副都御史二十一年陞右  
都御史先是李孜省黨嘗以私事訐瀟共媒孽之明  
年出瀟南京時占城王古來爲安南所侵挈國族奔  
泊廣東訟寃於朝守臣以聞方議遣官而人皆難  
之時李黨因欲傾瀟薦瀟往命下物議怖恐有私  
爲謀者曰盍以勅示衆猶可別圖避就毋落其機  
穽瀟笑卻之卽日戒行比至獻策者或曰安南藩臣

也當爲問罪之舉或曰占城脆弱遣回國莫保後艱  
宜留置之瀟曰用兵則毒民避強則取侮皆弗聽乃  
詣蒼梧諸郡覘知其情狀移檄安南諭以禍福俾圖  
逆順安南大恐辭對甚婉瀟曰此所謂不戰而先奪  
其氣矣可因撫而兩存之遂置安南而召古來諭歸  
國瀟欲以軍護其歸守臣忌不肯發乃卽召募千人  
習武事乘海舶二十艘以往繼息無動民者古來感  
恩以金銀器飾異香番木若干獻謝瀟麾卻之旣歸  
國復遣使馳謝并以聞上嘉其誠命受之瀟辭  
曰綏遠之仁繼絕之義在聖天子臣何功之有

上不允又懇辭從之令貯禮部自是二國輯睦弘治  
改元奉 命總督兩廣軍務兼理巡撫以親老乞終  
養不允留廣未一年斬獲徃徃數多 賜綵段銀兩  
柳州諸處戍軍舊皆番調風土殊習比歲死亡過半  
乃爲區處分守多所全活二年 勅還掌院事明年  
感疾 詔暫免朝參又遣中貴人御醫臨問 賜牲  
米酒菜以久疾乞還俸不許四年以疾歸省途聞母  
喪六年服闋 上特命回掌院事尋陞左都御史加  
太子少保時各處災異疊見上奏曰災異雖出於天  
感召寔由乎人必上下交修則災異可彌歷疏時弊

二十事以上 上悉命行之山西寧化王有不孝罪  
狀 命重臣往覈既實比至京王母改詞瀟方欲具  
奏原理官危之曰若聽其反覆吾輩何所逃罪瀟乃  
奏言王母前後詞異與民間告子而含忍息詞者例  
同遂得兩釋九年冢宰耿文恪擢卒時會舉四人而  
瀟名居第三 孝廟親書瀟名付內閣及居銓曹博  
採輿論廣寄耳目以公考選進退黜陟無所避有監  
司以憂去任或云其人宜黜瀟曰古者不伐有喪之  
國况無顯惡而乘是黜之耶每註選至煙瘴地停筆  
久之曰吾常經其地官多以瘴死必擇宜其風土者

因奏爲著令尤痛抑僥倖或造請者必寘其人於遠  
地有貴近爲所識求京職官乃語其使曰爾主爲一  
士孰若爲大臣耶勲貴有以玉帶獻囑以私者大怒  
叱遣之弘治六年以後頗多內降官漸冗因災異凡  
三執奏大意謂天下士事詩書而躬案牘秃銛鋒而  
竭筋力積數十年不可得而白身之人乃或因奔競  
乞憐或緣技藝蒙幸不可爲訓且今日之傳奉卽漢  
西邸之爵唐斜封之官宋內批之降甚爲政體累  
陛下當遠祖堯舜近守祖法豈可襲漢唐宋弊政  
乎衆皆服其確論言官有欲開納馬之例者卽抗疏

曰 朝廷倉庫及太僕見積尚多釋此不用反開是  
例萬一聞於北虜將謂中國戰馬財用俱已空竭不  
亦生戎心乎議遂格 清寧宮新成 詔許番僧入  
宮慶讚瀟率大臣再疏止之言甚剴切欽天監奏彗  
星見會九卿條陳十餘事曰早視朝勤聽政汰冗員  
節財用省差遣清鹽法申禁例修武備壯國威恤官  
軍撫邊民停改造惜供應黜異端警驕惰防詐僞皆  
切時政十年以二品秩滿 上念久勞命中官卽私  
第賜酒禮越三日加太子太保甫五月卽上疏言臣  
父已八十有五請預給一品封誥 詔許之十一年

會武宗出閣加陞太子太傅進階光祿大夫勲柱  
國賜麒麟一品服十三年有疾上數遣官臨問  
又遣御醫診視未幾以疾辭給驛還鄉仍命有司給  
月俸與皂以優其老歸一年父以壽終正德二年  
召以太子太傅禮部尚書兼左都御史掌院事賜  
蟒衣玉帶又累賜龍文詩軸及通鑑纂要後逆瑾  
專權驕僭凡所司擬議諷使先啟瀟不從時方嫉言  
官或欲因事加罪囑令笞之瀟曰御史風憲之官若  
箠辱之何以振揚風紀糾正百僚耶終不用其言又  
大起羅織之獄罪已應律者更欲比擬滋重瀟曰律

已明矣何比擬爲由是大忤瑾奏上輒怒乃拊拾瀟  
罪欲脅以從已卒不爲動瑾又以宿憾鉤擿致政兵  
部尚書劉大夏罪欲寘之死乃爲委曲救庇卒得減  
論江西民三戶造龍船爲歲戲瑾緝知旣籍其家猶  
欲論死瀟卒如原擬以復時論甚偉之有御史巡按  
雲南瑾私人誣以枉道諸罪乃力爲調護獲免瀟知  
勢不可回乞休致以正德壬申卒七十有三贈太保  
謚襄惠瀟聰穎絕人總角已能詩文比長學益邃雖  
位至宰輔手不釋卷尤精法律善折獄初王襄敏公  
越未見賞識一日命書所題孔雀圖詩偶虛後王公

意不然之徐謂曰汝其題補之頃刻作長歌進王公  
讀而笑曰奇至是乎自是深加愛重體貌魁梧秀整  
鬚長及臍嘗自稱髯翁平生無戚容愠色推賢讓能  
尤恐不及瀟旣加太子太保時馬端肅公以兵部班  
例居下謂其前輩齒尊疏讓之給事中魏珏等因事  
下獄時值暑月率九卿極論出之周文端公經將謝  
政又疏言其剛方有爲 陛下不宜苟遂其去及  
召問執對愈堅至拂 上意不避爲御史時有勸留  
草者則曰爲言官言其職耳傳奏草以銜名吾不爲  
也故終身未嘗存稿天性孝友事親脩極孝養父好

治魚池及守制時將鑿池以悅其意而未得地一夕  
夢神人謁曰吾當獻之覺而大驚異已而於居之乾  
隅購得隙地因鑿池得石多且巨又瑰奇可愛歎曰  
夢徵矣殆天意乎乃卽池山名曰天賜巖構亭於池  
前曰樂親亭云與人不設畛域無貴賤戚疏皆以恩  
雖胥徒臧獲不輕詬置當在庠時同進忌之者毀之  
於楊司訓數見斥辱及楊滿去惟浦父子餞於郊後  
道其地復收恤其子同輩嘗挾長侮浦者及貴顯其  
人媿乃厚禮之及謁選吏部終無所憾每自謂手持  
此筆掌刑獄惟恐誤殺一人掌銓衡惟恐誤黜一人

其存心如此

楊守隨

楊守隨字維禎鄞縣人生十歲棲芸先生授以四書史略諸書則能通大義十五從伯兄文懿公守陳受易學成化乙酉領鄉薦丙戌登進士第丁亥授江西道監察御史自治甚嚴時郡僚有爲權貴人相邀者獨不往後其人犯法衆避不敢鞫守隨按問如律衆皆服其先識已丑奉命巡視河道時亢暘水涸躬巡諸閘時其啓閉漕運大通有近宦黃賜縱其家奴兜攬白糧逼率驛遞者悉繩之以法於時河路肅靜

庚寅疏上明謚法重大臣容諫官守法律備儲蓄禁  
奸詐息餽餉等七事 上甚喜之辛卯陝西失機總  
兵官黃緣脫罪而獨坐鎮巡官上疏以爲法度貴乎  
畫一刑賞不宜異同請併論以法四月奉 勅查盤  
大同等處倉庫守隨素精數學至則親執簿書推算  
毫髮必盡委積官吏有望風解印綬去者人皆服其  
精明都察院舉總理三法司事凡所論列叅駁悉當  
於理壬辰疏上練兵將疏城壕鎮邊邑恤民困舉將  
才防患侮正邦憲明賞罰理軍務等九事皆切中時  
弊癸巳張真人以罪謫戍邊方黃緣權貴乞 恩終

養率衆力言其不法狀時論偉之又見天下諸司文  
卷不明請每三年一次差官照刷至今爲例有因凶  
荒奏令吏典納銀冠帶選用者乃執奏以爲作法於  
涼其弊猶貪示人以義其患猶利賣官鬻爵非時善  
政請以漕運米數萬斛賑濟 上深納之甲午巡按  
江西清滯獄減折納革冗費禁和賣誥奸貪表能賢  
善政不可枚舉乙未勅協同兵部侍郎原傑操練兵  
馬巡按江西八月聞父喪守制戊戌四月起服改福  
建道己亥職吏李孜省守隨按江西時問發充軍至  
是逃來京師以妖術得幸授太常寺丞乃劾奏孜省

以職得罪不宜典 郊廟百神之祀因改爲上林苑  
監正十月疏時政五事多采納庚子陞應天府丞丁  
內艱癸卯起復仍授前官舊例留都外羅城壞工部  
與應天寧國等府分脩後應天府獨當其事守隨曰  
役使不均民病日滋矣乃請諸撫按分任其工 內  
府松枝國子監膳夫鄉試供給俱奏行各府均派又  
奏革各衙門索取兩縣隸役工食者應天民力稍舒  
丁未朝 覲如京時攷省以禮部侍郎掌通政司事  
益近倖得密察百官遂以宿怨中傷之忽一日傳  
旨調外任授南寧知府弘治改元戊申二月陞應天

府尹以攷省被誅言路始舉之也巳酉復調謫廣西  
叅政先是承戶部奏委查勘守備太監蔣琮陳祖生  
故違禁例以開弊端事執法不徇乃反坐之甲寅陞  
廣西按察使乙卯擢南京都察院右僉都御史提督  
巡江兼操江條陳奏修戰船等事丙辰擢南京大理  
寺卿叅駁詳明一時獄訟稱平焉庚辰改大理寺卿  
充經筵官讞獄詳明部院推服癸亥六年考滿晉級  
資治尹進階正議大夫 甲子以七十引年 溫旨  
慰留因疏刑名十事皆著爲令乙丑 上宣至便殿  
語刑獄事每就事開陳無不忻納五月 武宗登極

十二月九載考滿陞工部尚書仍掌大理寺事屢疏  
懇辭不允時御史石玠等奏保任都御史以掌風紀  
不報正德改元進階資善大夫上命中官李榮視  
審錄時近侍張瑜及太醫院官四員俱以誤用御  
藥繫獄李承內意謂可矜疑守隨泣曰先帝梓宮  
在殯臣子憂憤方殷君父之事誤與故同例以春秋  
許世子之律豈宜輕貸李亦默然泣下衆皆畏伏而  
內侍實啗之初中官李興督造孝宗陵寢侵收柴  
銀盜伐皇陵松木事下法司興恃寵不服援新寧  
伯譚佑工部侍郎李鏐同罪乃叱之曰柴銀是汝侵

陵木是汝盜伐佑鏃二人止坐不行救正之  
惡得比而同之興語塞遂按其辟而內宦亦怨矣  
時逆閹劉瑾鼓惑盜權號爲八虎科道率以言得罪  
偕大司徒韓文都御史張敷華會部院百僚抗疏叩  
闕請誅瑾輩甚力瑾迎上泣訴遂除司禮監傳  
旨守隨及韓張諸公皆致仕二年丁卯正朔趨謝詒  
朝 陛辭比退輿隸皆畏瑾禍四逸徒步長安街有  
吏胥數人肩輿擁歸第明日遂行次於張家灣瑾潛  
令軍校隨之欲中以奇禍乃僦車就道一不煩於官  
府始免於害瑾乃矯 詔指守隨與大學士劉健謝

遷尚書韓文林瀚張敷華及科道等官凡五十三人  
自爲朋黨頒示天下三年戊辰自致仕家居杜門不  
出而瑾怨未解乃文致舊事罰米二千石宣府上納  
且逮及從弟故冢宰守陞亦落職爲卿亞方伯維德  
暨兄子司寇志仁皆罷歸庚午瑾復矯 詔削官爵  
追奪 誥封再罰米二百石先後被罰鬻田宅脫簪  
珥以償九月逆瑾伏誅科道交章薦其名重望隆才  
識優卓守正秉直堪以起用不報以餘黨尚在也始  
復原職致仕給還所奪 誥勅十四年以疾終年八  
十五易簀之時顧謂二子顯允曰吾位列正卿壽踰

八十櫟葉平生今將斃於正矣第以受國厚恩無補萬分此沒世之憾也敬戒我後人宜圖補報問以家事則搖首不言須更有風自牖如霧卽端坐瞑目而逝

朱瑄

朱瑄字廷璧號太樸鄞縣人登成化己丑進士未授官丁憂三年足不至城府旣終制郡守張公以白金爲贖辭曰筮仕之始公宜見教而乃有此張爲之改容癸巳授工部都水司主事督理通州諸倉兼出納官甓時倉圯者八百室久弗治乃程力役信賞罰不

踰年脩飭具備新剏者又四分之一而人不告勞官  
覽自臨清附漕舟而北必出紙充罰乃得竣事歲累  
紙可萬數瑄悉省之歷三載改營繕司移領蕪湖官  
稅法尚寬省碩嚴吏禁其質竹木諸細物者多弗徵  
踰年所積稅倍恒數及朝京復委脩蘆溝橋堤壬寅  
改命兵部領職方重寄凡所經畫詳慎不苟十九年  
遷員外郎二十年轉郎中乙巳值陝西大饑人相食  
朝廷簡諸郎官分道出賑得鳳翔乃觸炎暑兼晝夜  
以行若拯溺救焚然稽戶定籍量多寡給之民饑爲  
盜察情可矜者多縱遣就業又督有司給牛種躬自

稽察不爲文具計所活者六十萬有奇 召還之日  
老稚遮擁不忍捨去丙午陞河南左叅議適蝗旱相  
仍殫心沛澤全活民命不減於陝西弘治辛亥陞本  
省右叅政奉 勅撫治流民凡附籍安插并逃移人  
民立里以居給田以耕貪暴官吏豪強軍民懲治不  
少貸河南南陽等府盜採銀沙者衆結聚貽患乃勤  
巡視嚴禁約民安盜息及黃河決 朝廷命都御史  
劉大夏等條築瑄分理上流督開支河以殺其勢築  
黃陵岡以禦奔放然後水由故道民賴以安漕舟得  
濟境內踰時不雨赤地相望瑄謂河南府有伊洛二

渠彰德府有高平萬金二渠懷慶府有廣濟渠方口  
堰南陽府有召公等渠汝寧府有桃坡等堰許州有  
棗祇河渠苟盡人力可蘇民困白巡撫徐恪以聞

勅瑄專理其事因宜濬道置閘啓閘凡王府屯官之  
兼并豪右碾磨之侵據悉釐正之是以五府一州田  
得灌溉旱熯有備甲寅陞本省右布政使八年乙卯  
擢都察院右副都御史巡撫南直隸總理蘇松等府  
糧儲首修鎮江安慶太平宿松等學增朔江陰武進  
吳江等倉出帑藏糴千萬斛以備荒應天蘇松常鎮  
災傷之後雨澤愆期積誠祈禱感應如響丙辰年歲

幾大熟偶風雨大作狂流浸漫彌旬不退上奏減財  
賦洵三江下流以殺湖水濬孟瀆等河以通漕舟自  
蘇至崑山大倉者一遇風濤多罹覆溺盜賊出沒其  
間命外作長堤樹以柳木甃以石砌而中通舟楫其  
患乃息議建太倉州請割崑山常熟嘉定附近鄉都  
以隸之徽州府產無藤黃銀硃增派歲派抗疏止之  
他若內府供給各衙門坐派及運送人夫等項糜費  
鉅萬 奏乞裁省以固祖宗根本之地其酌糧解以  
免賠累嚴驛遞以省騷擾減賦稅以疏民困等事料  
理周悉至今永爲遵守丁巳夏駐節太倉忽中風疾

回次蘇州稍能語醫謂宜得鹿血和藥吳中一鹿可  
直數千文有以此來獻乃命破其耳取血僅足而已  
竟還之以疾致仕弘治甲子卒於家年六十五平生  
義利之辯最明齒及賄賂則呌然見於顏色故剔歷  
中外幾四十年家無厚殖飲仍陶匏歲凶家且缺食  
郡大夫以米四十斛爲餽一無所受當道檄樹都憲  
坊固辭不從其卒也乃貿棺於市人稱爲有守云

楊守陟

楊守陟字惟立別號碧川鄞縣人母張淑人孕甫八  
月夢大星懸於庭覺而生幼警敏六歲受業於栖芸

先生教以經傳既通大義十五從宦泉州爲古詩文  
迥出時輩景泰辛未以父喪歸得取正於其兄吏侍  
守陳學益邃成化乙酉舉浙江鄉試第一明年會試  
場畢聞張淑人遘疾馳歸省侍疾愈卒業大學會祭  
酒邢讓等三人爲怨家所傾坐昧繫獄乃草奏率六  
館士伏闕訟其冤至再事雖不自識者偉之戊戌  
會試得第四廷試賜及第授翰林院編修辛丑充  
廷試彌封官賜寶鏐丁未滿九載時江西李孜省  
以左道干紀與從兄工部尚書守隨素不相能既中  
傷之併出守陞爲南京翰林院侍讀至則署院事時

守陳方署事翰林士論以兄弟俱發解又南北分典  
詞垣爲斯文盛事弘治改元 召還翰林纂脩 憲  
廟實錄已酉充 經筵官極言進君子退小人爲治  
亂之機言甚激切 孝宗改容聽之辛亥 實錄成  
擢左春坊左諭德 賜白金文綺病士習浮靡文氣  
日入於弊其同考禮闈主應天順天鄉試俱務黜浮  
崇渾特稱得人丙辰署翰林院事預修 玉牒尋進  
翰林院學士奉 詔授庶吉士業丁巳充纂修 大  
明會典副總裁戊午 武宗春宮出閣講學充侍班  
已未遷南京吏部右侍郎奉 詔各舉所知以郎中

陳鎬評事主紀上後皆不負所舉署兵部以星變陳  
事皆切時弊 朝廷嘉納辛酉南監祭酒病卒諸生  
乘隙多易簿書以規速進及往署監事悉爲釐正滿  
三載詣 闕考績內閣以會典修久未完守陞精於  
史事奏留校閱與匏菴吳公同事勘訂精審居五月  
書成 賜宴禮部錄校閱功遷左侍郎食正二品錄  
賜寶鑑羊酒甲子考察南京諸司官屬去取允當乙  
丑上疏乞休不俟 命而歸旣得 旨進本部尚書  
致仕後逆瑾竊柄素憎正類矯 詔奪所加秩瑾誅  
復之性孝友天至事兄守陳恩義倍篤及謝世爲位

於室朝夕哭奠目爲之昏輯其遺文梓之以傳守隨以瑾誣繫獄又罰出米數百石輸邊乃罄所積爲助以旌償之不受於書無所不讀而必以六經四書爲之宗其學不專事文藝敦大本厲行檢精思力踐期於深造其誨子弟誨生徒皆率是道居常端重簡默與人論說義理則色溫氣和聽者忘倦致仕家居凡可及民言於所司賑荒蠲稅停無益之作陰受其惠者多所著有集程朱義論碧川文抄二十九卷困學寡聞錄十卷雜文儲稿又若干卷詩二十卷一日書數語於遺稿曰學文師韓吏部學道師程伊川官同

吏部二品壽過伊川二年文章可得而聞望道而未  
之見困學勉行老而不倦守正疾邪至死不變五日  
卒壽七十有七贈太子少保

### 李 堂

李堂字時升鄞縣人成化丁未進士展省東歸連丁  
內外艱哀毀踰禮幾不欲生終制久之方謁選工部  
屯田司主事監稅竹木於蕪湖先是中貴宋昂寅緣  
內批指取 御木張甚沮遏商人堂至務從寬減雖  
虧課重得罪弗計刮剔宿蠹照上年解額存留羨餘  
籍記以充後解宋意啣之所知每懼之以禍曰吾非

不知宋爲要人亦欲順適其意其如羣小觀望規利  
何此隙一開倖門益啓國課愈塞吾以身任之力杜  
其漸他尚奚恤已而復部尋陞營繕司員外郎調屯  
田司 詔修大明會典委造工典文冊又集屯田題  
稿議議革南京蘆洲積弊議禁易州厰科罰議革順  
天府功臣太監墳夫議減後府柴炭價銀以數事案  
呈申明著令大拂權倖衆方危之迄守正不動陞營  
繕司郎中 清寧宮災係 太皇太后寢闈 孝廟  
聖孝益虔 手勅營建堂議請發 內帑計蘇民困  
迴天戒雜議抗言減原計之半工成存積動支之數

什三是時提督英國張懋兵部尚書馬公陞工部尚書徐貫等廕賞有差聯章保堂翊扶 聖孝勞動奉溫旨陞京職二級堂三疏辭免略曰營繕乃臣子職業之當爲錢穀尤士類名檢之所惜宜循常資敢膺殊典以招物議銓部上請仍陞俸二級嗣歲 勅建禮部與修闕里費皆前積所遺民用不擾司空益倚重之至取回燒造饒器內臣痛抑寧府請益琉璃瓦價等事尤不避讐怨省費不貲太宰倪文毅雅相器重剡薦太常寺少卿吏科給事中王洧等疏其資望而薦之決竟沮止之復以應天府丞薦始得 旨堂

蒞屬縣剖理詞訟檢查錢糧句容縣給事中趙欽罪  
犯不法連坐無辜淹禁屢歲堂承委片言折之成獄  
獨置欽重典遠近稱快高淳溧陽句容縣姓孔大戶  
詐稱聖族脫漏科差究竟一體執役建平縣歲饑吳  
廣五等聚衆假以稱貸搶掠閭右共相守望禦侮殺  
賊訛言洗勦幾激大變堂單騎諭以禍福衆感泣執  
獻渠魁以殉脅從者慰遣歸農當道避之織造內臣  
崔侃越分科擾力奏止之正德丁卯南直隸鄉試有  
賄通關節巧取高第者人言沸騰往歲付之不知堂  
提調是科顯詆黜之者三人歷南京光祿寺卿四年

陞南京左僉都御史 勅整江南北未幾會工部缺  
右侍郎蒙 恩簡命從人望也交驩上卿凡大舉措  
必竭兩端開誠商論共成國是兩奉 璽書督修京  
倉落成汴徐河患告急 勅兼左僉都御史總理修  
濬抵曹縣因已集人夫築長堤自大名至沛縣三百  
餘里又自滎澤抵永城縣疏通水道以防潰決是時  
洊罹劉六劉七兵荒言官乞暫取回京 詔可之瀕  
行會計河南工費二千兩外山東存積并追完各處  
缺工之數共銀五萬兩有奇收庫作國正計不許擅  
支鎮守河南太監廖堂弟廖紀表裏內瑾重以巡按

御史張麟爲之心腹不遂侵漁深懷忿嫉後從巡撫  
便宜發此銀築汴城外郭防禦流賊民恃無恐存遺  
惠焉歸 命於朝引疾 詔許乘傳還鄉高蹈一十  
餘年閉門纂述有正學類編一十五卷四明文獻誌  
十卷梓行於時雜著堇山遺稿編簡若干藏之篋笥

### 楊子器

楊子器字名父慈谿人成化丙午經魁明年丁未進  
士除知崑山縣以父憂去弘治甲寅起復知常熟縣  
召拜吏部考功主事正德丙寅轉驗封員外郎尋陞  
郎中又四年遷湖廣叅議尋轉福建按察提學副使

一年轉河南右叅政尋進右布政使是歲以湖廣柳桂功受白金文綺之賜尋轉河南左布政使以入覲卒于衛輝子器每談治體自六部達諸鎮能歷道其故及當變通之宜北虜犯邊嘗陳邊務數十事馬鈞陽劉華容二公皆重嘆許弘治末多所建白至孝廟山陵方起聞有水石爲病上疏言之至下詔獄執不變未幾還原職歷二邑因時立政畫然歸於禮法毀諸淫祠以其材充廟學公署之用常熟稅入常後期令先輸者無耗期日遞加旣乃以多益寡耗足轉輸而民無敢後矣東南諸水由常熟白塘入海工侍

淳安徐公嘗合四郡疏利之會有漲沙當海口潮汐  
增淤水患如故便率民開之比歲衝流日深水不爲  
患汴城苦遠汲鑿井城中數十處皆得美泉又作屋  
以居織染貧匠其惠利如此爲考功郎中逆瑾勢方  
熾會有擬以翰林處之者聞之亟爲書辭於內閣事  
因以寢識者趨之初至湖廣分守辰常道會柳桂賊  
起遂請改道自劾冒暑提兵勦平之會轉河南時方  
以柳桂積勞成疾而東賊方渡河天又寒甚有勸緩  
行者亟輿而住卽至嵩縣居守賊方走湖廣曰賊必  
復向汝州洛陽藩籬備不可缺乃自嵩馳赴之賊至

輟食登城晝夜調度手書示城中人曰不上城及上而輒下者皆斬旣而有將下從賊者卽斬以徇城守益堅賊遂引去其臨事應遽如此山陵之獄救者兩京科道及庶吉士凡千人性介直濟以和易與人交能以量容以情恕不以辭色假故人無喜怒而有感愧其所建立亦足暴於天下矣

表 嫌

表嫌字景輝號慈齋慈谿人方壯年時以布衣晦迹江湖間爲文超厲卓越不作常語邑人未知也歲庚子前侍御江西吳公秀爲慈谿尹一日試士偶得其

卷於羣衆中獨驚嘆以爲奇士嫌由是知名是歲年二十五舉於鄉辛丑連舉進士及觀政工曹日赴部供事唯謹大司空賈公俊私識之旣而授南京兵部主事轉車駕員外郎皆耿直有聲守備中官蔣琮最驕橫以不法事相囑弗聽蔣銜之反駕以罪繫獄年餘獲宥有名自是益彰徹後改南京刑部員外郎郎中明刑執法稱西曹之最擢知廣州嶺南大郡前守以贖贖敗事旣至教令一新興仆舉墜每侵晨吏抱文案魚貫以進嫌爲指摘奸蠹畫一以示須臾而盡吏受成案而去噤不敢出一語一有告訐召其人訊之

立得其是非狀皆匍匐悔罪墜下始而紛訴盈庭繼而訟者益少人弗敢欺性度簡易率以嘻笑集事然本剛勁不肯習諛爲可否其所經畫苟自信卽上官欲撓之不可得廣南城控引諸番際大海茫洋數千里雖物貨阜繁而中有隱憂爲繕治城郭操練兵卒時戒不虞衆或迂之其後佛郎機之變人始服其先識郡屬如新寧等邑半爲盜區爍曰是未易以恩信撫也謀之督府次第舉兵取其渠魁誅之其後始懼而自戢尤善理冤獄先是有龍游人王姓者與其甥同貨於廣其甥被市肆無賴六七輩掠其貨殺之沉

於海王訟之御史下府理官鞫其事反坐王以罪王  
叫號稱屈嫌從旁踪跡之遂得劫殺者追其賊皆實  
悉置於法又有旅客爲人謀而死分其屍密遣人伺  
之獲其人乃所嘗與爲仇者亦正其罪由是治稱神  
明按撫以卓異言之朝詔進階亞中大夫食從三品  
俸而視事如舊將以需大用也正德初旣六載滿績  
適逆瑾欲以順天府丞缺償之冀得金三百兩嫌曰  
京兆丞顧可以賄賂得哉忤其意遂致政去去之日  
民攀送載路作爲詩文皆自出機軸鏗然可誦退而  
家居凡二十有七年日與三數耆舊徜徉於山顛水

涯絕口不言時事亦不溷跡於公府人尤以是爲難  
之沒於嘉靖壬辰距其生七十有七

### 張 曷

張曷浙江慈谿人也大父楷官僉都御史平巨寇有  
功曷少自樹立成化中登第知鉛山縣事求利民立  
規條簡便有法越數十年不能易有巫能役鬼物呪  
咀人立死人畏事恐後曷擒至榜笞數百自若也是  
夕大風揚沙石蔽天遶屋錚錚鈴索聲衆益駭以爲  
果神人也頌請釋曷卒致之死縣城南有西洋廟觀  
靈怪旁郡男婦祈禱充道路曷毀殿撤象祠以爲便

民倉

王 渙

王渙字時霖號毅齋寧波府人弘治丙辰進士初令長樂有善政徵拜御史連上疏極數逆瑾之奸惡瑾啣恨次骨矯旨杖于朝堂除名旣歸猶以他事論戍瑾誅諸謫徙者皆驟起而渙絕不一通政府以微憾竟抑不用士論惜之

王應鵬

王應鵬字天宇號定齋鄞縣人正德戊辰進士出宰嘉定會流賊兵至狼山吏民駭竄下令諭安之築城

拒守卒以無虞其他鋤暴扶傾廉威茂著魏國公弟  
徐淮擁衆橫囂欺軋間并至嘉定執之不少貸以風  
節徵拜監察御史糾劾不避權貴 武宗微行以死  
爭之烏思藏取佛抗疏力諫大學士石齋楊公奪情  
起復則劾奏之直聲凜凜動朝著清戎八閩按視東  
齊督學畿內嘗語諸生曰國初氣化渾厚士有實學  
故發爲文者論事析理足裨世教近來文體衰薄動  
以古書字句相摹擬求其中則索然無有不惟文不  
成體學不成章往往居官任職垂則僨事皆學術之  
禍也士服其教文治一新擢大理少卿遷僉都御史

巡撫畿甸整飭邊備上便宜數千言劇寇王朝相等  
弁兵殲滅之事聞賜白金文綺改撫山西晉右副都  
御史尋丁外艱歸

陸珂

陸珂字容之號石樓鄞縣人正德甲戌進士授南京  
車駕主事國朝自都北平畱都以快馬駑船運供億  
事久弊積珂爲增修造之費定往來之期均其勞逸  
厚薄而人宜之時中璫用事假名勢者旁午于道索  
舟動以百數力爲裁省寧藩亂武宗駕幸南都白  
巖喬公叅贊機務凡事引珂籌之曰我益友也陞安

慶知府郡經宸濠之變百計撫綏民得再生偶訊堂  
上忽報縣囚劫獄行且趨府顏色自若麾卒列所訊  
囚拽于庭下徐捕逸賊盡獲之蓋兩賊相通舍此趨  
彼則跳梁兩不可制於以見其沉機應變也陞貴州  
副憲都勻在萬山中民夷雜處有龍溪二場軍夷貿  
易常因以致亂乃以捕官防壓有剛恭者立執之衆  
咸惕然獨山同知蒙鉞父子仇殺七年平浪王武仲  
與阿向爭官仇殺十數年亞藤作亂餘黨尚存至則  
皆相率請聽約束王景羅糾拽黑苗入寇兼程馳至  
清平調兵圍之使人持檄諭以大義衆卽解去陞四

川叅政提督糧儲凡諸處倉庾遇近產米地方舟楫可通者自運本米其餘解折色委官于附近產米處糴米上倉官民便之再轉福建左轄入覲冢宰許松臯公詢以地方弊政條陳數事許公採而上聞晉右副都御史巡撫保定時世廟南幸倉卒經畫至忘寢食遂得疾疏乞歸里節丁內外艱憂毀不勝而卒

### 柴經

柴經字季常號松洲鄞縣人正德丁丑進士授刑曹主政武宗遊幸偕部僚伏闕力諫詔跪闕下五日廷杖三十奪半年久之擢湖廣僉憲辰州有鄭

生者所司以怨坐之死刑監司心知其寃而以生之  
富置不爲辨經獨條其寃狀侃侃無所顧忌生乃得  
免沅州判負當路肺腑戚橫恣貪虐按其罪一道慄  
然芒部告變將楚兵萬餘會總制伍公于貴陽勦平  
之遷貴州參政劇賊周天星之變川貴病焉朝議合  
兩撫臣兵攻之經調兵轉餉與賊對壘者幾及一週  
事平受鏹幣之賜久之晉南京右副都御史視院篆  
兼署事大理監生吳仕以無罪蒙重擬池守滅大姓  
徐正本從坐者數十人皆力爲平停得無寃濫未幾  
致仕歸

周相

周相字大卿浙江鄞縣人進士由臨川知縣選河南道御史建言 廷杖降韶州府經歷陞東鄉知縣累陞右副都御史巡撫江西疏請致仕

劉安

劉安字汝勉慈谿縣人進士由南工部主事改河南道御史建言降餘干縣典史陞鳳陽府知府

王杏

王杏字世文奉化縣人進士除山西道御史巡按貴州嘉靖十五年巡按山西建言 廷杖謫閑散